



文選卷第四十六

序下

梁昭明太子蕭統撰

豪士賦序一首

陸士衡

夫立德之基有常而建功之路不一何則循心
以爲量者存乎我因物以成務者繫乎彼存夫
我者隆殺止乎其域繫乎物者豐約唯所遭遇
落葉俟微風以隕而風之力蓋寡孟嘗遭雍門
而泣琴之感以末何者欲隕之葉無所假烈風

將墜之泣不足繁哀響也是故苟時啓在天理
盡在民庸夫可以濟聖賢之功斗筲可以定烈
士之業言遇時也故曰才不半古而功已倍之
蓋得之在時勢也歷觀古今徼一時之功而居
伊周之位者有矣夫我之自我智士猶嬰其累
物之相物昆蟲皆有此情夫以自我之量而挾
非常之勲神器暉其顧盼萬物隨其俯仰心玩
居常之安耳飽從諛之說豈識乎功在身外任
出才表者哉且好榮惡辱有生之所大期忌盈

害上鬼神猶且不免人主操其常柄天下服其
大節故曰天可讎乎而時有絃服荷戟立乎廟
門之下援旗誓衆在阡陌之上况乎代主制
命自下裁物者哉廣樹恩不足以敵怨勤興利
不足以補害故曰代大匠斲者必傷其手且夫
政由寡氏忠臣所為慷慨祭則寡人人主所不
久堪是以君奭鞅鞅不悅公旦之舉高平師師
側目傅陸之勢而成王不遣嫌吝在懷宣帝若
負芒刺在背非其然者與嗟乎光于四表德莫

富馬王曰叔父親莫昵焉登帝天位功莫厚焉
守節沒齒忠莫至焉而傾側顛沛僅而自全則
伊生抱明允以嬰戮文子懷忠敬而齒劔固其
所也因斯以言夫以篤聖穆親如彼之懿大德
至忠如此之盛尚不能取信於人主之懷止謗
於衆多之口過此以往惡覩其可安危之理斷
可識矣又况乎饗大名以冒道家之忌運短才
而易聖哲所難者哉身危由於勢過而不知去
勢以求安禍積起於寵盛而不知辭寵以招福

見百姓之謀已則申宮警守以崇不畜之威懼
萬民之不服則嚴刑峻制以賈傷心之怨然後
威窮乎震主而怨行乎上下衆心日侈危機將
發而方偃仰睜眦謂足以夸世笑古人之未工
忘已事之已拙知曩勲之可矜暗成敗之有會
是以事窮運盡必於顛仆風起塵合而禍至常
酷也聖人忌功名之過已惡寵祿之踰量蓋爲
此也夫惡欲之大端賢愚所共有而游子徇高
位於生前志士思垂名於身後受生之分唯此

而巳夫蓋世之榮名莫大焉震主之勢位莫盛焉率意無違欲莫順焉借使伊人頗覽天道知盡不可益盈難久持超然自引高揖而退則魏巍之盛仰邈前賢洋洋之風俯冠來籍而大欲不之於身至樂無愆乎舊節彌效而德彌廣身愈逸而名愈劬此之不為彼之必昧然後河海之跡堙為窮沉一簣之舉積成山岳名編凶頑之條身馱荼毒之痛豈不謬哉故聊賦焉庶使百世少有寤云

三月三日曲水詩序一首

顏延年

夫方策既載皇王之迹已殊鐘石畢陳舞詠之情不一雖淵流遂往詳略異聞然其宅天衷立民極莫不崇尚其道神明其位拓世貽統固萬葉而為量者也有宋函夏帝圖弘遠高祖以聖武定鼎規同造物皇上以敝文承歷景屬宸居隆周之上既末宗漢之兆在焉正體毓德於少陽王宰宣哲於元輔啓緯昭應山瀆效靈五方

雜遝四隩來暨選賢建戚則擇之於茂典施命
發號必酌之於故實大予協樂上庠肆教章程
明密品式周備國容眡令而動軍政象物而具
箴闕記言校文講藝之官采遺於內轎車朱軒
懷荒振遠之使論德于外蘋莖素毳并柯共穗
之瑞史不絕書棧山航海踰沙軼漠之貢府無
虛月烈燧千城通驛萬里穹居之君內首稟朔
卉服之會廻面受吏是以異人慕響俊民間出
警蹕清夷表裏悅穆將徙縣中宇張樂岱郊增

類帝之宮飭禮神之館塗歌邑誦以望屬車之
塵者久矣日躔胃維月軌青陸皇祗發生之始
后王布和之辰思對上靈之心以惠庶萌之願
加以二王於邁出餞戒告有詔掌故爰命司歷
獻洛飲之禮具上巳之儀南除輦道北清禁林
左關巖墜右梁潮源略亭臯跨芝廕苑太液懷
曾山松石峻堦葱翠陰煙游泳之所稽萃翔驟
之所往還於是離宮設衛別殿周徼旌門洞立
延帷接榭闕水環階引池分席春官聯事蒼靈

奉塗然後升秘駕胤緹騎搖玉鑿發流吹天動
神移淵旋雲被以降扞行所禮也既而帝暉臨
幄百司定例鳳蓋俄軫虹旗委旆肴蕝芬藉觴
醑泛浮妍歌妙舞之容銜組樹羽之噐三奏四
上之調六莖九成之曲競氣繁聲合變爭節龍
文飾轡青翰侍御華裔殷至觀聽鶩集楊袂風
山舉袖陰澤靚裝藻野衮服緝川故以殷賑外
區煥衍都內者矣上應萬壽下提百福巾筵稟
和闔堂依德情盤景遽歡洽日斜金駕惣駟聖

儀載佇悵鈞臺之未臨慨艷宮之不縣方且排
鳳闕以高游開爵園而廣宴並命在位展詩發
志則夫誦美有章陳信無愧者歟

三月三日曲水詩序一首

王元長

臣聞出豫爲象鈞天之樂張焉時乘既位御氣
之駕翔焉是以得一奉宸逍遙襄城之域體元
則大悵望姑射之阿然睿眇寂寥其獨適者已
至如夏后兩龍載驅璿臺之上穆滿八駿如舞

瑤水之陰亦有饗云固不與萬民共也我大齊
之握機創歷誕命建家接禮二宮考庸太室幽
明獻期雷風通饗昭華之珍旣徙延喜之王攸
歸革宋受天保生萬國度邑靜鹿丘之歎遷鼎
息大垆之軫紹清和於帝猷聯顯懿於王表駿
發開其遠祥定爾固其洪業皇帝體膺上聖運
鍾下武冠五行之秀氣邁三代之英風昭章雲
漢暉麗日月牢籠天地彈壓山川設神理以景
俗敷文化以柔遠澤普汜而無私法含弘而不

殺猶且具明廢寢昊晷忘餐念負重於春冰懷
御奔於秋駕可謂巍巍弗與蕩蕩誰名秉靈圖
而非泰涉孟門其何險儲后睿哲在躬妙善居
質內積和順外發英華斧藻至德琢磨令範言
炳丹青道潤金壁出龍樓而問豎入虎闈而齒
胄愛敬盡於一人光耀究於四海若夫族茂麟
趾宗固磐石跨躔昌姬韜軼炎漢元宰比肩於
尚父中玄繼踵乎周南分陝流勿剪之勸來仕
允克施之譽莫不如珪如璋令問令望朱芾斯

皇室家君王者也本枝之盛如此稽古之政如
彼用能免群生於湯火納百姓於休和草萊樂
禁守屏稱事引鏡皆明目臨池無洗耳沈冥之
怨既缺適軸之疾已消興廉舉孝歲貢於外府
署行議年日夕於中甸協律揔章之司序倫正
俗崇文成均之職導德齊禮挈壺宣夜辨氣朔
於靈臺書笏珥彤紀言事於仙室褰帷斷裳危
冠空履之吏影搖武猛扛鼎揭旗之士勤恤民
隱糾逃王慝射集隼於高墉繳大風於長隧不

仁者遠惟道斯行讒莠蔑聞攘爭掩息稀鳴桴
於砥路鞠茂草於圓扉者年闕市井之游稚齒
豐車馬之好宮隣昭泰荒憬清夷侮食來王左
言入侍離身反踵之君髹首貫胃之長屈膝厥
角請受纓縻文鉞碧斨之琛竒幹善芳之賦純
牛露犬之玩乘黃茲白之駟盈衍儲邸充仞郊
虞甌牘相尋鞮譯無曠一尉候於西東合車書
於南北暢轂埋麟麟之轍綏旌卷悠悠之旆四
方無拂五戎不距偃革辭軒銷金罷弁天瑞降

地符升澤馬來噐車出紫脫華朱英秀伎枝植
歷草滋雲潤星暉風揚月至江海呈象龜龍載
文方握河沈壁封山紀石邁三五而不追踐八
九之遙迹功既成矣世既貞矣信可以優游暇
豫作樂崇德者歟于時青鳥司開條風發歲粵
上斯已惟暮之春同律克和樹草自樂楔飲之
日在茲風舞之情咸蕩去肅表平時訓行慶動
於天矚載懷平圃乃睠芳林芳林園者福地奧
區之湊丹陵若水之舊殷殷均乎姚澤膺膺尚

在周原狹豐邑之未宏陋譙居之猶褊求中和
而經處揆景緯以裁基飛觀神行虛檐雲構離
房乍設層樓間起八負朝陽而抗殿跨靈沼而浮
榮鏡文虹於綺疏吐浸蘭泉於玉砌幽幽叢薄秩
秩斯于曲拂迢迢八游浚徑復新萍泛吐華桐發
岫雜天采於柔葦八亂嚶聲於絳羽禁軒承幸清
宮侯宴緹帷宿罟帶幕宵懸既而滅宿澄霞登
光辨色戒道執事八展軫效駕徐鑿警節明鐘暢
音七萃連鑣九旌齊軌建旗拂蜺揚葭振木魚

甲煙聚貝曹星羅重英曲瑤之飾絕景追風之
騎昭灼甄部駟駿函列虎視龍超雷駭電逝轟
轟隱隱紛紛軫軫羌難得而稱計爾乃廻輿駐
罕岳鎮淵渟睟容有穆賓儀式序授几肆筵因
流波而成次蕙肴芳醴任激水而推移葆佾陳
階金匏在席戚奏翹舞籥動邠詩召鳴鳥於弁
州追伶倫於嶰谷發參差於王子傳妙靡於帝
江正歌有闕羽觴無算上陳景福之賜下獻南
山之壽信凱讌之在藻知和樂於食苹桑榆之

陰不居草露之滋方渥有詔曰今日嘉會咸可
賦詩凡四十有五人其辭云爾

王文憲集序

任彥升

公諱儉字仲寶琅邪臨沂人也其先自秦至宋
國史家謀詳焉晉中興以來六世名德爲海內
冠冕古語云仁人之利天道運行故呂虔歸其
佩刀郭璞誓以淮水若離翦之止殺吉駿之誠
感蓋有助焉公之生也誕授命世體三才之茂
典踐得二之庶幾信乃昴宿垂芒德精降祉有

一于此蔚爲帝師沈乃淵角殊祥山庭異表望
衢罕窺其術觀海莫際其瀾宏覽載籍博游才
義若乃金版玉匱之書海上名山之旨沈鬱澹
雅之思離堅合異之談莫不摠制清衷遞爲心
極斯固通人之所包非虛明之絕境不可窮者
其唯神用者乎然檢鏡所歸人倫異表雲屋天
構匠者何工自函洛不守憲章中輟賀生達禮
之宗蔡公儒林之亞闕典未補大備茲日至若
齒危髮秀之老含經味道之生莫不北面人宗

自同資敬性託夷遠少屏塵雜自非可以弘獎
風流增益標勝未嘗番心也期歲而孤叔父司
空簡穆公早所器異年始志學家門禮訓皆折
衷於公孝友之性豈伊橋梓夷雅之體無待韋
弦汝郁之幼挺淳至黃琬之早標聰察曾何足
尚年六歲襲封豫寧侯拜日家人以公尚幼弗
之先告旣襲珪組對揚王命因便感咽若不自
勝初宋明帝居蕃與公母武康公主素不協及
卽位有詔毀發舊塋投棄棺柩公以死固請誓

不遵奉表啓酸切義感人神太宗聞而悲之遂
無以奪也初拜秘書郎遷太子舍人以選尚公
主拜駙馬都尉元徽初遷秘書丞於是采公魯
之中經刊弘度之四部依劉歆七略更撰七志
蓋嘗賦詩云稷契匡虞夏伊呂翼商周自是始
有應務之迹生民屬心矣時司徒袁粲有高世
之度脫落塵俗見公弱齡便望風推服歎曰衣
冠禮樂盡在是矣時粲位亞台司公年始弱冠
年勢不侔公與之抗禮因贈粲詩要以歲暮之

期申以止足之戒粲答詩云老夫亦何寄之子
照清襟服闋拜司徒右長史出爲義興太守風
化之美奏課爲最還除給事黃門侍郎旬日遷
尚書吏部郎參選昔毛玠之清公李重之識會
兼之者公也俄遷侍中以愍始終之職固辭不
拜補太尉右長史時聖武定業肇基王命寤寐
風雲是資人傑是以宸居膺列宿之表圖締著
王佐之符俄遷左長史齊臺旣建以公爲尚書
右僕射領吏部時年二十八宋末艱虞百王澆

季禮素舊宗樂傾恒執自朝章國紀典彙備物
奏議符策文辭表記素意所不蓄前古所未行
皆取定俄傾神無滯用太祖受命以佐命之功
封南昌縣開國公食邑二千戶建元二年遷尚
書左僕射領選如故自營郤分司盧欽兼掌舉
望所歸允集茲日尋表解選詔加侍中又授太
子詹事侍中僕射如故固辭侍中改授散騎常
侍餘如故太祖崩遺詔以公爲侍中尚書令鎮
軍將軍永明元年進號衛將軍二年以本官領

丹陽尹六輔殊風五方異俗公不謀聲訓而楚
夏移情故能使解劔拜仇歸田息訟前郡尹溫
太真劉真長或功銘鼎彛或德標素尚臭味風
雲千載無爽親加弔祭表薦孤遺遠協神期用
彰世祀時簡穆公薨以撫養之恩特深恒慕表
求解職有詔不許國學初興華夷慕義經師人
表允茲望實復官領國子祭酒三年解丹陽尹
領太子少傅餘悉如故挂服捐駒前良取則卧
轍棄子後子胥然皇太子不矜天姿俯同人範

師友之義穆若金蘭又領本州太中正頃之解
職四年以本號開府儀同三司餘悉如故謙光
愈遠大典未申六年又申前命七年固辭選任
帝所重違詔加中書監猶參掌選事長輿追專
車之恨公曾甘鳳池之失夫奔競之塗有自來
矣以難知之性協易失之情必使無訟事深弘
誘公提衡惟允一紀于茲拔竒取異興微繼絕
望側階而容賢候景風而式典春秋三十有八
七年五月三日薨于建康官舍皇朝軫慟儲鉉

傷情有識銜悲行路掩泣豈直春者不相功女
寢機而已哉故痛深衣冠悲纏教義豈非功深
砥礪道邁舟航沒世遺愛古之益友追贈太尉
侍中中書監如故給節加羽葆鼓吹增班劍爲
六十人諡曰文憲禮也公在物斯厚居身以約
玩好絕於耳目布素表於造次室無姬妾門多
長者立言必雅未嘗顯其所長持論從容未嘗
言人所短弘長風流許與氣類雖單門後進必
加善誘勗以丹青之價弘以青真之期公銓品

人論各盡其用居厚者不矜其多處薄者不怨其少窮淫而反盈量知歸皇朝以治定制禮功成作樂思我民譽緝熙帝圖雖張曹等論於漢朝荀摯競爽於晉世無以仰模淵旨取則後昆每荒服請罪遠夷慕義宣威授指寔寄宏略理積則神無忤往事感則悅情斯來無是已之心事隔於容諂罕愛憎之情理絕於毀譽造理常若可干臨事每不可奪約已不以廉物弘量不以容非攻乎異端歸之正義公生自華宗世務

簡隔至於軍國遠圖刑政大典既道在廊廟則理擅民宗若乃明練庶務鑒達治體懸然天得不謀成心求之載籍翰牘所未紀評之遺老耳目所不接至若文案自環主者百數皆深文爲吏積習成奸畜筆削之刑懷輕重之意公乘理照物動必研幾當時嗟服若有神道豈非希世之雋民瑚璉之宋器時行無異操才無異能得奉名節迄將一紀一言之譽東陵侔於西山一面之榮鄭璞踰於周寶士感知已懷此何極出

入禮闈朝夕舊館瞻棟宇而興慕撫身名而悼
 恩公自幼及長述作不倦固以理窮言行事該
 軍國豈直彫章縉采而已哉若乃統體必善綴
 賞無地雖楚趙群才漢魏衆作曾何足云昉嘗
 以筆札見知思以薄技效德是用綴緝遺文永
 貽世範爲如干卷所撰古今集記今書七志爲
 一家之言不列于集集錄如左

文選卷第四十六終

音釋

鞅差亮切 陔直氏切 逌徒和切 毳昌銳切 陞音鄧 塿古較切 櫜在官 脊音鳥
 坳古螢切 適音和 憬九求切 睡側慮切 鞅丁令切 瑤側紋切 郤音鳥

文選卷第四十七

梁昭明太子蕭統撰

頌

聖主得賢臣頌

王子淵

夫荷旃被毳者難與道純緜之麗密羹藜吟糗者不足與論太牢之滋味今臣僻在西蜀生於窮巷之中長於蓬茨之下無有游觀廣覽之知顧有至愚極陋之累不足以塞厚望應明旨雖然敢不畧陳愚心而杼情素如此則使離婁督

繩公輸削墨雖崇臺五層延袤百丈而不溷者
工用相得也庸人之御駑馬亦傷吻弊筴而不
進於行曾喘膚汗人極馬倦及至駕齧膝驂乘
且王良執靶韓哀附輿縱騁馳務驚忽如影靡過
都越國蹶如歷塊追奔電逐遺風周流八極萬
里一息何其遼哉人馬相得也故服絺絰之涼
者不苦盛夏暑之鬱燠襲狐貉之煖者不憂至寒
之淒滄何則有其具者易其備賢人君子亦聖
王之所以易海內也是以嘔喻受之開寬裕之

路以延天下之英俊也夫竭智附賢者必建仁
策索人求士者必樹伯迹昔周公躬吐握之勞
故有圖空之隆齊桓設庭燎之禮故有匡合之
功由此觀之君人者勤於求賢而逸於得人人
臣亦然昔賢者之未遭遇也圖事揆策則君不
用其謀陳見悃誠則上不然其信進仕不得施
效斥逐又非其愆是故伊尹勤於鼎俎太公困
於鼓刀百里自鬻甯子飯牛離此患也及其遇
明君遭聖主也運籌合上意諫諍則見聽進退

得闕其忠任職得行其術去卑辱與潔而升本
朝離蔬釋躄而享膏粱剖符錫壤而光祖考傳
之子孫以資說士故世必有聖智之君而後有
賢明之臣虎嘯而谷風冽龍興而致雲氣蟋蟀
俟秋吟呼蛸出以陰易曰飛龍在天利見大人
詩曰思皇多士生此王國故世平主聖俊又將
自至若堯舜禹湯文武之君獲稷契皋陶伊尹
呂望之臣明明在朝穆穆列布聚精會神相得
益章雖伯牙操篋鍾蓬門子寧烏號猶未足以

喻其意也故聖主必待賢臣而弘功業俊士亦
俟明主以顯其德上下俱欲懽然交欣千載一
會論說無疑翼乎如鴻毛遇順風沛乎若巨魚
縱大壑其得意如此則胡禁不止曷令不行化
溢四表橫被無窮遐夷貢獻萬祥必臻是以聖
主不徧窺望而視已明不殫傾耳而聽已聰恩
從祥風翺德與和氣游太平之責塞優游之望
得遵游自然之勢恬淡無爲之場休徵自至壽
考無疆雍容垂拱永永萬年何必偃仰訕信若

彭祖照噓呼吸如喬松眇然絕俗離世哉詩曰
濟濟多士文王以寧蓋信乎其以寧也

趙充國頌

楊子雲

明靈惟宣戎有先零先零猖狂侵漢西疆漢命
虎臣惟後將軍整我六師是討是震既臨其域
喻以威德有守矜功謂之弗克請奮其旅于罕
之羌天子命我從之鮮陽營平守節屢奏封章
料敵制勝威謀靡亢遂克西戎還師于京鬼方
賓服罔有不庭昔周之宣有方有虎詩人歌功

乃列于雅在漢中興克國作武赳赳栢栢亦紹
厥後

出師頌

史孝山

茫茫上天降祚有漢兆基開業人神攸贊五曜
睿映素靈夜歎皇運來授萬寶增煥歷紀十二
天命中易西零不順東夷邁逆乃命上將授以
雄戟栢栢上將寔天所啓允文允武明詩悅禮
憲章百揆爲世作楷昔在孟津惟師尚父素旄
一麾渾一區宇蒼生更始朔風變律薄伐獫狁

至于太原詩人歌之猶歎其艱況我將軍窮城
極邊鼓無停響旗不斂寒澤霑遐荒功名鼎鉉
我出我師于彼西疆天子餞我路車乘黃言念
伯舅恩深渭陽介珪旣削列壤酬勲今我將軍
啓土上郡傳子傳孫顯顯令問

酒德頌

劉伯倫

有大人先生以天地爲一朝萬期爲須臾日月
爲肩牖八荒爲庭衢行無轍跡居無室廬幕天
席地縱意所如止則操卮執觚動則挈榼提壺

唯酒是務焉知其餘有貴介公子搢紳處士聞
吾風聲議其所以乃奮袂攘袂怒目切齒陳說
禮法是非鋒起先生於是方俸鬕承槽銜杯漱
醪奮髯踣踞枕麴藉糟無思無慮其樂陶陶兀
然而醉豁爾而醒靜聽不聞雷霆之聲熟視不
覩泰山之形不覺寒暑之切肌利欲之感情俯
觀萬物擾擾焉如江漢之載浮萍二豪侍側焉
如蜾蠃之與螟蛉

漢高祖功臣頌

陸士衡

相國鄧文終侯沛蕭何相國平陽懿侯沛曹參
太子少傅留文成侯韓張良丞相曲逆獻侯陽
武陳平楚王淮陰韓信梁王昌彭越淮南王六
黥布趙景王大梁張耳韓王韓信燕王豐盧綰
長沙文王吳芮荆王沛劉賈太傅安國懿侯王
陵左丞相絳武侯沛周勃相國舞陽侯沛樊噲
右丞相曲周景侯高陽酈商太僕汝陰文侯沛
夏侯嬰丞相賴陰懿侯睢陽灌嬰代丞相陽陵
景侯魏傅寬車騎將軍信武肅侯靳歙大行廣

野君高陽酈食其中郎達信侯齊劉劭太中大
夫楚陸賈太子太傅稷嗣君薛叔孫通魏無知
護軍中尉隨何新成三老董公轅生將軍紀信
御史大夫沛周苛平國君侯公右三十一人與
定天下安社稷者也頌曰

茫茫宇宙上塲下躡波振四海塵飛五岳九服
徘徊三靈改卜赫矣高祖肇載天祿沈跡中鄉
飛名帝錄慶雲應輝皇階授木龍興泗濱虎嘯
豐谷彤雲晝聚素靈夜哭金精仍頽朱光以渥

萬邦宅心駿民效足堂堂蕭公王跡是因網繆
敵后無競惟人外濟六師內撫三秦拔竒夷難
邁德振民體國垂制上穆下親名蓋羣后是謂
宗臣平陽樂道在變則通爰淵爰嘿有此武功
長嘔河朔電擊壤東協策淮陰亞跡蕭公文成
作師通幽洞冥永言配命因心則靈窮神觀化
望影揣情鬼無隱謀物無遁刑武關是闢鴻門
是寧隨難滎陽即謀下邑銷印甚廢推齊勸立
運籌固陵定策東襲三王從風五侯允集霸楚

寔喪皇漢凱入怡顏高覽弭翼鳳戢託跡黃老
辭世却粒曲逆宏達好謀能深游精杳漠神跡
是尋重玄匪奧九地匪沈伐謀先兆擠響于音
竒謀六奮嘉慮四迴規主於足離項于懷格人
乃謝楚翼寔摧韓王窘執胡馬洞開迎文以謀
哭高以哀灼灼淮陰靈武冠世策出無方思入
神契奮臂靈興騰跡虎噬陵險必夷摧剛則脆
肇謀漢濱還定渭表京索旣扼引師北討濟河
夷魏登山滅趙威亮火列勢踰風掃拾代如遺

偃齊猶草二州肅清四邦咸舉乃眷北燕遂表
東海克滅龍且爰取其旅劉項懸命人謀是與
念功惟德辭通絕楚彭越觀時弢迹匿光人具
爾瞻翼爾鷹揚威凌楚域質委漢王靖難河濟
即宮舊梁烈烈黥布耽耽其聒名冠疆楚鋒猶
駭電觀幾蟬蛻悟主革面肇彼梟風翻爲我扇
天命方輯王在東夏矯矯三雄至于垓下元凶
旣夷寵祿來假保大全祚非德孰可謀之不滅
舍福取禍張耳之賢有聲梁魏士也罔極自詒

伊媿俯思舊恩仰察五緯脫跡違難披榛來洎
改策西秦報辱吐冀粹葉更輝枯條以肄王信
韓孽宅土開疆我圖爾才越遷晉陽盧縮自微
婉變我皇跨功踰德祚爾輝章人之貪禍寧爲
亂亡吳芮之王祚由梅銷功微勢弱世載忠賢
肅肅荆王董我王軍我圖四方殷薦其勲庸親
作勞舊楚是分往踐厥宇大啓淮濟安國違親
悠悠我思依依哲母旣明且慈引身伏劔未言
固之淑人君子寔邦之基義形於色憤發于辭

主亡與亡末命是期絳侯質木多略寡言曾是
忠勇惟帝倏歎雲鶩靈丘景逸上蘭平代禽豨
奄有燕韓寧亂以武斃呂以權滌穢紫宮徵帝
太原實惟太尉劉宗以安挾功震主自古所難
勲耀上代身終下藩舞陽道迎延帝幽藪宣力
王室匪惟厥武摠干鴻門披闥帝宇聳顏誚項
掩淚寤主曲周之進于其哲兄俾率爾徒從王
于征振威龍蛻據武墉城六師寔因克荼禽黠
猗歟汝陰綽綽有裕戎軒肇跡荷策來附馬煩

繼殆不釋擁樹皇儲時又平城有謀賴陰銳敏
屢爲軍鋒奮戈東城禽項定功乘風藉響高步
長江收吳引淮光啓于東陽陵之勲元帥是承
信武薄伐揚節江陵夷王殄國俾亂作懲恢恢
廣野誕節令圖進謁嘉謀退守名都東規白馬
北距飛狐即倉敖庾據險三塗輪軒東踐漢風
載徂身死于齊非說之辜我皇寔念言祚爾孤
建信委輅被褐獻寶指明周漢銓時論道移帝
伊洛定都豐鎬柔遠鎮邇寔敬攸考抑抑陸生

知言之貫往制勁越來訪皇漢附會平勃夷凶
翦亂所謂伊人邦家之彥百王之極舊章靡存
漢德雖朗朝儀則昏稷嗣制禮下肅上尊穆穆
帝典煥其盈門風晞三代憲流後昆無知敎敏
獨昭奇跡察侔蕭相既同師錫隨河辯達因資
於敵紆漢披楚唯生之績皤皤董叟謀我平陰
三軍縞素天下歸心袁生秀朗沈心善昭漢旆
南振楚威自撓大畧淵回元功響效邈哉惟人
何識之妙紀信誑項軺軒是乘攝齋赴節用死

孰懲身與煙消名與風興周苛慷慨心若懷冰
形可以暴志不可凌貞軌偕沒亮跡雙升帝疇
爾庸後嗣是膺天地雖順王心有違懷親望楚
未言長悲侯公伏軾皇媼來歸是謂平國寵命
有輝震風過物清濁效響大人于興利在攸往
弘海者川崇山惟壤韶護錯音袞龍比象明明
衆哲同濟天網劔宣其利鑿獻其朗文武四充
漢祚克廣悠悠遐風千載是仰

贊

東方朔畫贊

夏侯孝若

大夫諱朔字曼倩平原厭次人也魏建安中分厭次以爲樂陵郡故又爲郡人焉事漢武帝漢書具載其事先生瓌瑋博達思周變通以爲濁世不可以富貴也故薄游以取位苟出不可以直道也故頽頽以傲世傲世不可以垂訓也故正諫以明節明節不可以久安也故談諧以取容潔其道而穢其跡清其質而濁其文弛張而不爲邪進退而不離羣若乃遠心曠度瞻智宏

材個僮博物觸類多能合變以明筭幽贊以知來自二墳五典八索九丘陰陽圖緯之學百家衆流之論周給敏捷之辨支離覆逆之數經脉藥石之藝射御書計之術乃研精而究其理不習而盡其功經目而諷於口過耳而聞於心夫其明濟開豁包含弘大陵轢卿相嘲哂豪傑籠罩靡前蹈籍貴勢出不休顯賤不憂戚戲萬乘若察友視儻列如草芥雄節邁倫高氣蓋世可謂拔乎其萃游方之外者已談者又以先生嘯

吸冲和吐故納新蟬蛻龍變棄俗登仙神交造化靈爲星辰此又竒怪惚恍不可備論者也大人來守此國僕自京都言歸定省覩先生之縣邑想先生之高風徘徊路寢見先生之遺像道遙城郭觀先生之祠宇慨然有懷乃作頌焉其辭曰

矯矯先生肥遁居貞退不終否進亦避榮臨世灌足希古振纓濯而無滓旣濁能清無滓伊何高明克柔能清伊何視汙若浮樂在必行處儉

罔憂跨世陵時遠蹈獨游瞻望往代爰想遐蹤邈邈先生其道猶龍染迹朝隱和而不同棲遲下位聊以從容我來自東言適茲邑敬問墟墳企佇原隰墟墳徒存精靈永戢民思其軌祠宇斯立徘徊寺寢遺像在圖周旋祠宇庭序荒蕪穰棟傾落草萊弗除肅肅先生豈焉是居是居弗形悠悠我情昔在有德罔不遺靈天秩有禮神監孔明彷彿風塵用垂頌聲

三國名臣序贊

袁彥伯

夫百姓不能自治故立君以治之明君不能獨治則爲臣以佐之然則三五迭隆歷世承基揖讓之與干戈文德之與武功莫不宗匠陶鈞而羣才緝熙元首經略而股肱肆力雖遭離不同且跡有優劣至於體分冥固道契不墜風美所扇訓革千載其揆一也故二八升而唐朝盛伊呂用而湯武寧三賢進而小白興五臣顯而重耳霸中古凌遲斯道替矣居上者不以至公理物爲下者必以私路期榮御圓者不以信誠率

衆執方者必以權謀自顯於是君臣離而名教薄世多亂而時不治故蘧寧以之卷舒柳下以之三黜接輿以之行歌魯連以之赴海袁世之中保持明節君臣相體若合符契則燕昭樂毅古之流也夫未遇伯樂則千載無一驥時值龍顏則當年控三傑漢之得材於斯爲貴高祖雖不以道勝御物羣下得盡其忠蕭曹雖不以三代事主百姓不失其業靜亂庇人抑亦其次夫時方顛沛則顯不如隱萬物思治則默不如語

是以古之君子不患弘道難遭時難遭時不難
遇君難故有道無時孟子所以咨嗟有時無君
賈生所以垂泣夫萬歲一期有生之通塗千載
一遇賢智之嘉會遇之不能無欣喪之何能無
慨古人之言信有情哉余以暇日常覽國志考
其君臣比其行事雖道謝先代亦異世一時也
文若懷獨見之明而有救世之心論時則民方
塗炭計能則莫出魏武故委面霸朝豫議世事
舉才不以標鑒故久之而後顯籌畫不以要功

故事至而後定雖亡身明順識亦高矣董卓之
亂神器遷偪公達慨然志在致命由斯而談故
以大存名節至如身為漢隸而跡入魏幕源流
趣舍其亦文若之謂所以存亡殊致始終不同
將以文若既明名教有寄乎夫仁義不可不明
則時宗舉其致生理不可不全故達識攝其契
相與弘道豈不遠哉崔生高朗折而不撓所以
策名魏武執笏霸朝者蓋以漢主當陽魏后北
面者哉若乃一旦進爾君臣易位則崔子所不

與魏武所不容夫江湖所以濟舟亦所以覆舟
仁義所以全身亦所以亡身然而先賢玉摧於
前來哲攘袂於後豈非天懷發中而名教束物
者乎孔明盤桓俟時而動遐想管樂遠明風流
治國以禮民無怨聲刑罰不濫沒有餘泣雖古
之遺愛何以加茲及其臨終顧託受遺作相劉
后授之無疑心武侯處之無懼色繼體納之無
貳情百姓信之無異辭君臣之際良可詠矣公
瑾卓爾逸志不羣總角料主則素契於伯符晚

節曜竒則參分於赤壁惜其齡促志未可量子
布佐策致延譽之美輟哭止哀有翼載之功神
情所涉豈徒謇惇而已哉然而杜門不用登壇
受譏夫一人之身所照未異而用舍之間俄有
不同况沈跡溝壑遇與不遇者乎夫詩頌之作
有自來矣或以吟詠情性或以述德顯功雖大
旨同歸所託或乖若夫出處有道名體不滯風
軌德音爲世作範不可廢也故復撰序所懷以
爲之讚云魏志九人蜀志四人吳志七人荀彧

字文若諸葛亮字孔明周瑜字公瑾荀攸字公達龐統字士元張昭字子布袁渙字曜卿蔣琬字公琰魯肅字子敬崔琰字季珪黃權字公衡諸葛瑾字子瑜徐邈字景山陸遜字伯言陳羣字長文顧雍字元歎夏侯玄字泰初虞翻字仲翔王經字承宗陳泰字玄伯火德旣微運纏大過洪飈扇海二溟揚波虬虎雖驚風雲未和潛魚擇淵高鳥候柯赫赫三雄並迴乾軸競收杞梓爭采松竹鳳不及棲龍不暇伏谷無幽蘭嶺

無亭菊英英文若靈鑒洞照應變知微探賸賞要日月在躬隱之彌曜文明映心鑽之愈妙滄海橫流土石同碎達人兼善廢已存愛謀解時紛功濟宇內始救生人終明風槩公達潛朗思同著蔡運用無方動攝羣會爰初發跡邁此鎮沛神情玄定處之彌泰惜惜幕裏筭無不經疊疊通韻跡不暫停雖懷尺璧顧哂連城知能拯物愚足全生卽中溫雅器識純素貞而不諒通而能固恂恂德心汪汪軌度志成弱冠道敷歲

暮仁者必勇德亦有言雖遇履虎神氣恬然行
不脩飾名跡無愆操不激切素風愈鮮邈哉崔
生體正心直天骨踈朗牆宇高疑忠存軌跡義
形風色思樹芳蘭剪除荆棘人惡其上時不容
哲琅琅先生雅杖名節雖遇塵霧猶振霜雪運
秘道消碎此明月景山恢誕韻與道合形器不
存方寸海納和而不同通而不雜遇醉忘辭在
醒貽荅長文通雅義格終始思戴元首擬伊同
耻民未知德懼若在已嘉謀肆庭讜言盈耳玉

生雖麗光不踰把德積雖微道映天下淵哉泰
初字量高雅器範自然標準無假全身由直跡
澆必僞處死匪難理存則易萬物波蕩孰任其
累六合徒廣容身靡寄君親自然匪由名教敬
授既同情禮兼列烈烈王生知死不撓求仁不
遠期在忠孝玄伯剛簡大存名體志在高構增
堂及陞端委虎門正言彌啓臨危致命盡其心
禮堂堂孔明基宇宏邈器同生民獨稟先覺標
榜風流遠明管樂初九龍盤雅志彌確百六道

喪干戈迭用苟非命世孰掃雰雰宗子思寧薄
言解控釋褐中林鬱爲時棟士元弘長雅性內
融崇善愛物觀始知終喪亂備矣勝塗未隆先
生標之振起清風綢繆哲后無妄惟時夙夜匪
懈義在緝熙三略旣陳霸業已基公琰殖根不
忘中正豈曰摸擬實在雅性亦旣羈勒負荷時
命推賢恭已久而可敬公衡冲達秉心淵塞媚
茲一人臨難不惑疇昔不造假翮鄰國造能徽
音退不失德六合紛紜民心將變鳥擇高梧臣

須顧眄公瑾英達朗心獨見披草求君定父一
面桓桓魏武外託霸迹志掩衡霍恃戰志敵卓
卓若人曜竒赤壁二光參分宇宙暫隔子布擅
名遭世方擾撫翼桑梓息肩江表王略威夷吳
魏同寶遂獻宏謨匡此霸道桓王之薨大業未
純把臂託孤惟賢與親輟哭止哀臨難忘身成
此南面寔由老臣才爲世出世亦須才得而能
任貴在無猜昂昂子敬拔跡草萊荷檐吐竒乃
構雲臺子瑜都表體性純懿諫而不犯正而不

毅將命公庭退意私位豈無鵠鷄固慎名器伯
言蹇蹇以道佐世出能勤功入能獻替謀寧社
稷解紛挫銳正以招疑忠而獲戾元歎穆遠神
和形檢如彼白珪質無塵玷立上以恒匡上以
漸清不增絜濁不加染仲翔高亮性不和物好
是不羣折而不屈屢摧逆鱗直道受黜嘆過孫
陽放同賈屈詵詵衆賢千載一遇整轡高衢驤
首天路仰挹玄流俯弘時務名節殊途雅致同
趣日月麗天瞻之不墜仁義在躬用之不匱尚

想遐風載挹載味後生擊節懦夫增氣

文選卷第四十八


梁昭明太子蕭統撰

符命

封禪文

司馬長卿

伊上古之初肇自昊穹之生民歷選列辟以迄於秦率邇者踵武逖聽者風聲紛綸威蕤湮滅而不稱者不可勝數也繼韶夏崇號謚略可道者七十有二君罔若淑而不昌疇逆矣而能存軒轅之前遐哉邈乎其祥不可得聞已五三六



經載籍之傳維風可觀也書曰元首明哉股肱
良哉因斯以談若莫盛於唐堯臣莫賢於后稷
后稷創業於唐公劉發跡於西戎文王改制爰
周邳隆大行越成而後陵遲衰微千載亡聲豈
不善始善終哉然無異端慎所由於前謹遺教
於後耳故軌迹夷易遵也湛恩龐鴻易豐也
憲度著明易則也垂統理順易繼也是以業隆
於禳祿而崇冠於二后揆厥所元終都攸卒未
有殊尤絕跡可考於今者也然猶躡梁父登泰

山建顯號施尊名大漢之德逢涌原泉沕潏曼
羨旁魄四塞雲布霰散上暢九垓下泝八埏懷
生之類霑濡浸潤協氣橫流武節森逝邇陬遊
原遐闊沫沫首惡鬱沒晦昧昭晰昆蟲閭憚回
首面內然後圉駟虞之珍羣徼麋鹿之怪獸導
一莖六穗於庖犧雙觔其柢之獸獲周餘珍放
龜于岐招翠黃乘龍於沼鬼神接靈圉賓於間
館竒物譎詭倣儻窮變欽哉符瑞臻茲猶以爲
德薄不敢道封禪蓋周躍魚隕航休之以燎微

夫斯之爲符也以登介丘不亦愿乎進讓之道
何其爽歟於是大司馬進曰陛下仁育羣生義
征不諛諸夏樂貢百蠻執贄德侔往初功無與
二休烈浹洽符瑞衆變期應紹至不特創見意
者泰山梁甫設壇場望幸蓋踰以况榮上帝垂
恩儲祉將以慶成陛下謙讓而弗發也契三神
之歡缺王道之儀羣臣愿焉或謂且天爲質闇
示珍符固不可辭若然辭之是泰山靡記而梁
父罔幾也亦各並時而榮咸濟厥世而屈說者

尚何稱於後而云七十二君哉夫脩德以錫符
奉命以行事不爲進越也故聖王不替而脩禮
地祇謁款天神勒功中嶽以章至尊舒盛德發
號榮受厚福以浸黎元皇皇哉斯事天下之壯
觀王者之不業不可貶也願陛下全之而後因
雜摺紳先生之略術使獲曜日月之末光絕炎
以展案錯事猶兼正列其義裒師厥文作春秋
一藝將襲舊六爲七據之無窮俾萬世得激清
流揚微波飛英聲騰茂實前聖所以未保鴻名

而常爲稱首者用此宜命掌故悉奏其儀而覽
焉於是天子沛然改容曰俞乎朕其試哉乃遷
思迴慮揔公卿之議詢封禪之事詩大澤之博
廣符瑞之富遂作頌曰

自我天覆雲之油油甘露時雨厥壤可游滋液
滲漉何生不育嘉穀六穗我穡曷蓄非唯雨之
又潤澤之非唯徧之我汜布護之萬物熙熙懷
而慕思名山顯位望君之來君乎君乎侯不邁
哉般般之獸樂我君圃白質黑章其儀可嘉旼

旼穆穆君子之態蓋聞其聲今親其來厥塗靡
從天瑞之徵茲亦於舜虞氏以與濯濯之麟游
彼靈時孟冬十月君徂郊祀馳我君與帝用享
祉三代之前蓋未嘗有宛宛黃龍興德而升采
色炫耀煥炳輝煌正陽顯見覺悟黎蒸於傳載
之云受命所乘厥之有章不必諄諄依類託寓
喻以封禪披藝觀之天人之際已交上下相發
允荅聖王之德兢兢翼翼故曰於興必慮衰安
必思危是以湯武至尊嚴不失肅祗舜在假典

顧省闕遺此之謂也

劇秦美新

楊子雲

諸吏中散大夫臣雄稽首再拜上封事皇帝陛下臣雄經術淺薄行能無異數蒙渥恩拔擢倫比與羣賢並位愧無以稱職臣伏惟陛下至聖之德龍興登庸欽明尚古作民父母爲天下主執粹精之道鏡照四海聽聆風俗博覽廣包參天貳地兼並神明配五帝冠三王開闢已來未之聞也臣誠樂昭著新德光之罔極往時司馬

相如作封禪文一篇以彰漢氏之休臣嘗有顛眴病恐一旦先犬馬填溝壑所懷不章長恨黃泉敢竭肝膽寫腹心作劇秦美新一篇雖未究萬分之一亦臣之極思也臣雄稽首再拜以聞曰權輿天地未祛睢睢盱盱或玄而萌或黃而牙玄黃剖判上下相嘔爰初生民帝王始存在乎混混茫茫之時釁聞罕漫而不昭察世莫得而云也厥有云者上罔顯於犧皇中莫盛於唐虞邈靡著於成周仲尼不遭用春秋因斯發言

神明所祚兆民所託罔不云道德仁義禮智獨
秦崛起西戎邠荒岐雍之疆因襄文宣靈之僭
跡立基孝公茂惠文奮昭莊至政破縱擅衡并
吞六國遂稱乎始皇盛從鞅儀韋斯之邪政馳
驚起剪恬賁之用兵剗滅古文刮語燒書弛禮
崩樂塗民耳目遂欲流唐漂虞滌殷蕩周難除
仲尼之篇籍自勤功業改制度軌量咸稽之於
秦紀是以耆儒碩老抱其書而遠遜禮官博士
卷其舌而不談來儀之鳥肉角之獸狙獷而不

臻甘露嘉醴景曜浸潭之瑞潛大第經竇巨狄
鬼信之妖發神歇靈液海水羣飛二世而亡何
其劇與帝王之道兢兢乎不可離已夫能貞而
明之者窮祥瑞回而昧之者極妖愆上覽古在
昔有憑應而尚缺焉壞徹而能全故若古者稱
堯舜威侮者陷桀紂况盡汎埽前聖數千載功
業專用已之私而能享祐者哉會漢祖龍騰飛
沛奮迅宛葉自武關與項羽戮力咸陽創業蜀
漢發跡三秦克項山東而帝天下摘秦政慘酷

尤煩者應時而蠲如儒林刑辟歷紀圖典之用
稍增焉秦餘制度項氏爵號雖違古而猶襲之
是以帝典闕而不補王綱弛而未張道極數殫
闇忽不還逮至大新受命上帝還資后土顧懷
玄符靈契黃瑞涌出津渤沕滴川流海濘雲動
風偃霧集雨散誕彌八圻上陳天庭震聲日景
炎光飛響盈塞天淵之間必有不可辭讓云爾
於是乃奉若天命窮寵極崇與天剖神符地合
靈契創億兆規萬世竒偉倜儻譎詭天祭地事

其異物殊怪存乎五威將帥班乎天下四十有
八章登假皇穹鋪衍下土非新家其疇離之卓
哉煌煌真天子之表也若夫白鳩丹鳥素魚斷
虵方斯蔑矣受命甚易格來甚勤昔帝纘皇王
纘帝隨前踵古或無爲而治或損益而亡豈如
新室委心積意儲思垂務旁作穆穆明旦也不
寐勤勤懇懇者非秦之爲與夫不勤勤則前人
不當不懇懇則覺德不愷是以發祕府覽書林
遙集乎文雅之囿翱翔乎禮樂之場胤殷周之

失業紹唐虞之絕風懿律嘉量金科玉條神卦
靈兆古文畢發炳煥照耀靡不宣臻式軫軒旂
旗以示之揚和鸞肆夏以節之施黼黻袞冕以
昭之正嫁娶送終以尊之親九族淑賢以穆之
夫改定神祇上儀也欽脩百祀感秩也明堂雍
臺壯觀也九廟長壽極孝也制成六經洪業也
比懷單于廣德也若復五爵度三壤經井田免
人役方甫刑匡馬法恢崇祇庸爍德懿和之風
廣彼摛紳講習言諫箴誦之塗振鷺之聲充庭

鴻鸞之黨漸階俾前聖之緒布濩流行而不韞
積郁郁乎煥哉天人之事盛矣鬼神之望允塞
羣公先正罔不夷儀姦宄寇賊罔不振威紹少
典之苗著黃虞之裔帝典闕者已補王綱弛者
已張炳炳麟麟豈不懿哉厥被風濡化者京師
沈潛甸內而洽侯衛厲揭要荒濯沐而述前典
巡四民迄四嶽增封秦山廣禪梁甫斯受命者
之典業也蓋受命日不暇給或不受命然猶有
事矣况堂堂有新正丁厥時崇嶽滄海通瀆之

神咸設壇場望受命之臻焉海外遐方信延頸
企踵回面內嚮喁喁如也帝者雖勤讓惡可以
已乎宜命賢哲作帝典一篇奮三為一襲以示
來人摛之罔極令萬世常戴巍巍履栗栗臭馨
香含其實鏡純粹之至精聆清和之正聲則百
工伊凝庶績越熙荷天衢提地釐斯天下之上
則已庶可試哉

典引

班孟堅

臣固言永平十七年臣與賈逵傳毅杜矩展隆
郗萌等召詣雲龍門小黃門趙宜持秦始皇帝
本紀問臣等曰太史遷下贊語中寧有非邪臣
等對曰此贊實誼過秦篇言向使子嬰有庸主
之才僅得中佐秦之社稷未宜絕也此言非是
即召臣入問本聞此論非邪將見問意開寤耶
臣具對素聞知狀詔因曰司馬遷著書成一家
言揚名後世至以身陷刑之故反微文刺譏貶
損當世非誼士也司馬相如誇行無節但有浮

華之詞不周於用至於疾病而遺忠主上求取其書竟得頌述功德言封禪事忠臣效也至是賢遷遠矣臣固常伏刻誦聖論昭明好惡不遺細微緣事斷誼動有規矩雖仲尼之因史見意亦無以加臣固被學最舊受恩浸深誠思畢力竭情昊天罔極臣固頓首伏惟相如封禪靡而不典揚雄美新典而無實然皆游揚後世垂爲舊式臣固才朽不及前人蓋詠雲門者難爲音觀隨和者難爲珍不勝區區竊作典引一篇雖

不足雍容明盛萬分之一猶樂啟發憤懣覺悟童蒙光揚大漢軼聲前代然後退入溝壑死而不朽臣固愚戇頓首頓首曰太極之元兩儀始分烟烟熅熅有沈而奧有浮而清沈浮交錯庶類混成肇命民主五德初起同于草昧玄混之中踰繩越契寂寥而亡詔者系不得而綴也厥有氏號紹天闡繹莫不開元於太昊皇初之首上哉愛乎其書猶可得而脩也亞斯之世通變神化函光而未曜若夫上稽乾則降承龍翼而

華之詞不周於用至於疾病而遺忠主上求取其書竟得頌述功德言封禪事忠臣效也至是賢遷遠矣臣固常伏刻誦聖論昭明好惡不遺細微緣事斷誼動有規矩雖仲尼之因史見意亦無以加臣固被學最舊受恩浸深誠思畢力竭情昊天罔極臣固頓首伏惟相如封禪靡而不典揚雄美新典而無實然皆游揚後世垂爲舊式臣固才朽不及前人蓋詠雲門者難爲音觀隨和者難爲珍不勝區區竊作典引一篇雖

不足雍容明盛萬分之一猶樂啓發憤懣覺悟童蒙光揚大漢軼聲前代然後退入溝壑死而不朽臣固愚戇頓首頓首曰太極之元兩儀始分烟烟熅熅有沈而奧有浮而清沈浮交錯庶類混成肇命民主五德初起同于草昧玄混之中踰繩越契寂寥而亡詔者系不得而綴也厥有氏號紹天闡繹莫不開元於太昊皇初之首上哉曼乎其書猶可得而脩也亞斯之世通變神化函光而未曜若夫上稽乾則降承龍翼而

炳諸典謨以冠德卓綽者莫崇乎陶唐陶唐舍胤而禪有虞有虞亦命夏后稷契熙載越成湯武股肱既周天廼歸功元首將授漢劉俾其承三季之荒末值亢龍之災孽懸象闇而怕文乖彝倫斁而舊章缺故先命玄聖使綴學立制宏亮洪業表相祖宗贊揚迪哲備哉粲爛贊聖明之式雖臯夔衡旦密勿之輔比茲禩矣是以高光二聖宸居其域時至氣動乃龍見淵躍拊翼而未舉則威靈紛紜海內雲蒸雷動電煥胡縊

莽分尚不泣其誅然後欽若上下恭輯羣后正位度宗有丕德不台淵穆之讓靡號師矢牧奮撫之容蓋以膺當天之正統受克讓之歸運蓄炎上之烈精蘊孔佐之弘陳云爾洋洋乎若德帝者之上儀誥誓所不及已鋪觀二代洪纖之度其贖可探也並開迹於一簣同受侯甸之服奕世勤民以方伯統牧乘其命賜彤弧黃鉞之威用討韋顧黎崇之不恪至于參五萃夏京遷鎬亳遂自比面虎螭其師革滅天邑是故誼士

華而不敦武稱未盡護有慙德不其然與亦猶
於穆猗耶翕純皦繹以崇嚴祖考殷薦宗配帝
發祥流慶對越天地者烏奕乎千載豈不克自
神明哉誕略有常審言行於篇籍光藻朗而不
渝耳矧夫赫赫聖漢魏魏唐基泝測其源乃先
孕虞育夏甄殷陶周然後宣二祖之重光襲四
宗之緝熙神靈日照光被六幽仁風翔乎海表
威靈行乎鬼區慝亡回而不泯微胡璫而不顧
故夫顯定三才昭登之績匪堯不與鋪聞遺策

在下之訓匪漢不弘厥道至於經緯乾坤出入
三光外運渾元內霑豪茫性類循理品物咸亨
其已久矣盛哉皇家帝世德臣列辟功君百王
榮鏡宇宙尊亡與亢乃始虔鞮勞謙兢兢業業
貶成抑定不敢論制作至於遷正黜色色質監之
事渙揚寓內而禮官儒林屯用篤誨之士不傳
祖宗之髮髯雖云優慎無乃蕙與於是三事岳
牧之寮僉爾而進曰陛下仰監唐典中述祖則
俯蹈宗軌躬奉天經惇睦辨章之化洽巡靖黎

蒸懷保鰥寡之惠浹燔瘞懸沈肅祇羣神之禮
備是以來儀集羽族於觀魏肉角馴毛宗於外
囿擾緇文皓質於郊升黃輝采鱗於沼其露宵
零於豐草三足軒翥於茂樹若乃嘉穀靈草竒
獸神禽應圖合諫窮祥極瑞者朝夕坰牧日月
邦畿卓犖方州洋溢乎要荒昔周姬有素雉朱
烏玄秬黃葵之事耳君臣動色左右相趨濟濟
翼翼峨峨如也蓋用昭明夤畏承聿懷之福亦
以寵靈文武貽燕後昆覆以懿鑠豈其爲身而

有顛辭也若然受之亦宜勤恁旅力以充厥道
啓恭館之金滕御東序之祕寶以流其占夫圖
書亮章天哲也孔繇先命聖乎也體行德本正
性也逢吉丁辰景命也順命以創制因定以和
神荅三靈之蕃祉展放唐之明文茲事體大而
允寤寐次於心瞻前顧後豈蔑清廟憚勅天命
也伊考自遂古乃降戾爰茲作者七十有四人
有不俾而假素罔光度而遺章今其如台而獨
闕也是時聖上固以垂精遊神苞舉藝文屢訪

羣儒俞咨故老與之斟酌道德之淵源餉覈仁
義之林藪以望元符之臻焉旣感羣后之謹辭
又悉經五繇之碩慮矣將緝萬嗣揚洪輝奮景
炎扇遺風播芳烈久而逾新用而不竭汪汪乎
丕天之宏律其疇能亘之哉唐哉皇哉皇哉唐
哉

文選卷第四十八終

